

T2665/8615(2)

CM	0	1	2	3	4	5	6	7	8	9	10	11	12	13	14	15	16	17
Lab D50 2°	95/0/2	81/0/0	66/0/0	51/0/1	35/0/0	20/0/0	29/19/54	55/39/33	40/9/43	42/57/29	82/4/79	51/50/13	50/28/29					
	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/43	52/48/17	31/21/-21	72/-23/57	73/19/68						

CHINESE - JAPANESE LIBRARY IN
HARVARD - YENCHING INSTITUTE
AT HARVARD UNIVERSITY
JAN 30 1961

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

卷之三

祠祭

禮部祠祭司

唐臘用辰宋興臘用戌正觀以前寅禘百神卯祭社
宮臘享宗廟開元以後三祭同用臘辰建隆之制祭
百神社稷宗廟同用臘戌○祠部令應先代帝王三
年一享牲用太牢建隆四年詔來年仲春以羊豕代
太牢致饗帝高辛廟在宋州堯在晉州臨汾以稷契
配舜在河中府以皋繇配禹在陝州夏縣以伯益配
湯在鄆師以伊尹配文王在鄆舊配以太公望唐封
太公望武成王以廟食今以師尚父配武王在鎬以

哈佛大學漢和
圖書館珍藏印

隆平集卷第三

祠祭

附封爵

齊魯親王高靈孫在道行

唐臘用辰宋興臘用戌正觀以前寅禘百神卯祭社
宮臘享宗廟開元以後三祭同用臘辰建隆之制祭
百神社稷宗廟同用臘戌○祠部令應先代帝王三
年一享牲用太牢建隆四年詔來年仲春以羊豕代
大牢致饗帝高辛廟在宋州堯在晉州臨汾以稷契
配舜在河中府以皐繇配禹在陝州夏縣以伯益配
湯在鄆師以伊尹配文王在鄆舊配以太公望唐封
太公望武成王以廟食今以師鬻熊配武王在鎬以

周公配漢高祖在長陵以蕭何配光武在南陽以鄧禹吳漢賈復耿弇配唐太宗在醴泉以長孫無忌房喬杜如晦魏徵李靖配乾德四年詔先代帝王各置守陵戶太皞葬長沙黃帝葬長沙高陽葬臨河帝高辛葬濮陽帝堯葬城陽穀林帝舜葬零陵九疑女媧葬趙城禹葬會稽湯葬寶鼎文王武王並葬成陽漢高祖葬長安世祖葬洛陽唐高祖葬三原太宗葬醴泉九臯山竝五戶每歲春秋長吏以羊代牛奉祀尚中宗至隋文帝十陵竝三戶歲一享秦始皇至石晉高祖十五陵竝二戶三歲一享周桓王至後唐清泰

帝三十八陵止禁樵採淳化三年秘書監李至上言國初舉藏冰之法於司寒之祭常在四月行之按幽詩七月四之日獻羔祭韭蓋周以十一月爲正而四月者今之二月也春秋傳曰日在北陸而藏冰謂夏十二月日在虛危也獻羔祭韭謂二月春分始開冰室也火出而畢賦火星昏見謂三月四月中也又月令仲春天子獻羔開冰先薦寢廟詳開冰之祭當在春秋而行之四月乃有司之失也上然之命正其理○集賢校理胡宿言火正闕伯之祠在南京乃國朝受命之地自祖宗以來未領於祠官臣切爲朝廷惜

之事下禮官言闕伯爲堯火正實居商丘主祀大火能宿其官後世因之祀爲貴神配火侑食國家有天下之號實本於宋五運之次又盛火德謂其因興王之地商丘之舊作爲壇兆秩祭大火配以闕伯以辰戌出納之月詔留司長吏奉祭事上是其議而行之○皇祐間上謂大臣曰前世禮神有祭玉燔玉今於祀典無乃闕乎文彥博對曰唐太常卿王起以當時祀事止有燔玉因請下有司求良玉始造璧琮等九器以祀神已事則藏之而燔玉止用珉蓋唐以來禮神之玉已不備上曰朕奉事天地祖宗豈於寶玉有

所愛乎其令有司備制製之時沙州適貢玉乃擇其良者製爲璧琮等九器其黝璜尤粹溫祭玉之備蓋始於此矣○有神降于終南山道士劉守真以爲天之宗神號黑殺將軍守真每齋戒祈請必至則室中風蕭然聲如嬰兒獨守真能曉開寶九年太祖不豫驛召守真令問焉曰上天宮闕成玉鎖開矣晉王有人心言訖不復降太平興國六年封神爲翊聖將軍○咸平四年封劍州梓潼神順濟王爲英顯王王張惡子也生越雋仕晉戰歿郡國志云惡子嘗至長安見姚萇謂之曰別後九年君入蜀梓潼七曲山頭有

叢林僕所居也叩樹當有應者及符堅命萇入蜀因此至七曲山訪得其處舉策叩樹有闈人出曰此神君仙室也萇曰神君可得見乎入白有頃數吏前導見堂宇壯麗侍御擁神君出乃張君也敘舊設席張樂酒酣萇辭神敕左右授以一杖曰有兵革事所指如意萇得之戰無不尅唐明皇入蜀神迎於萬里橋僖宗播遷亦有冥助故封爵順濟王咸平三年蜀寇王均叛有登城指賊大呼曰梓潼神遣我來九月二十日城陷矣賊射之不見及期果驗帥臣以聞故改是封焉

刑罰

諸州大辟舊皆藩臣專決枉濫者衆時務姑息不復究問建隆三年詔自今郡國斷大辟竝錄案朱書格律及禁勘月日官典名銜以聞委刑部覆視仁宗哀矜庶獄官失入死罪者終身不得改官吏部常引對選人韓中正以失人人罪報罷後刑部引爲詳斷官上見其奏謂王欽若曰此豈嘗引對者耶欽若對曰然上曰旣嘗用法不當乃可以爲法官乎詔劾引用者罪○沈德妃之弟惟恭樂安郡主之壻張承衍同管勾會靈觀觀燔坐黜惟恭蔡州承衍汝州竝管庫

妃主交爲言乞留京師仁宗曰已行之命爲貴戚所
回則法徒設矣命趨行

燕樂

酺飲起自秦法三人會飲則罰金故因事賜酺吏民
會飲過則禁之太宗嘗謂輔臣曰朕讀唐史書每見
睿宗以後賜酺或連夜七日九日亦或彌月無乃太
甚乎娛樂不可過三日爲得宜矣玄宗令三百里內
刺史縣令各率音樂集郡下能無勞擾耶雍熙九年
冬南郊禮畢詔賜大酺三日丙申自丹鳳樓至朱雀
門張樂遷四市物貨會五方士女水車旱船往來御

道爲魚龍曼延之戲又集開封府縣及諸軍樂人列
御樓前音樂間發觀者溢路上御樓燕群臣賜畿甸
耆老酒食列坐于下大中祥符以後屢講是制○上
元張燈舊止三夜乾德五年太祖謂宰臣曰今朝廷
無事稼穡豐稔當縱士庶俾之行樂詔開封府更增
兩夜遂爲定制故事學士赴上有敕設獼猴之戲其
禮又闕張洎蘇易簡除翰林學士特命設教坊雜伎
樞密直學士知制誥以上咸與其集太宗因謂侍臣
曰學士清切貴重朕常恨不得爲之○聖祖降後上
謂王旦等曰先天降聖節欲設齋醮止刑罰屠宰其

日聽士庶以延壽帶續命縷保生酒更相贈遺因示帶縷一奩皆金銀珠翠繒綵爲之且曰陛下製此非止崇奉蓋欲均福衆庶臣等不勝大慶

愛民 方藥附

嶺南旣平太祖因覽桂陽監歲入白金數謂宰相曰山澤之利雖多頗聞採納不易自今減舊額三分之一以寬之○太平興國二年有司奏江南諸州權茶於松江州軍置八務民有匿而不聞許鄰里告給賞詔從之自唐建中四年趙贊判度支始稅竹木茶漆其後戶部侍郎張滂遂請移山茶根於茶園舊茶悉

焚棄天下怨之九年王涯誅令狐楚代涯請入其租於戶部人莫不悅乾德後雖禁民私賣而茶之利盡入縣官民不以爲擾太宗覽福建版籍謂宰相曰陳洪進以漳泉二州贍軍數萬無名科斂民所不堪比朝廷悉已蠲削煩苛稅名吾民當小康矣端拱二年河北屯軍乏糧度支使李惟清發河南十七州民運送上曰今已春深農事正急豈宜更興此役惟清固請乃遣左正言馮拯乘傳與轉運使規度止請發冀州餘糧輸邊它俟農隙上因召惟清語之曰掌邦計者當以民爲本軍食雖少民力不任計司須務變

通自今宜以利民爲先無致厚歛且財貨所以濟用
度取不以道豈朕愛民之意耶○淳化二年許商人
納粟麥分江淮官茶以給其直謂之折博倉商人甚
便之國初有折中倉或言其弊而罷之及端拱初以
折中倉罷歲失國用百萬之八遂欲復置以歲歉而
止至是始復而更其名曰折博公私以爲便至道元
年八月知開封縣裴麗正言畿縣見欠夏稅蠶鹽三
司令折納大麥今已過時上曰三司害政甚矣八月
課民輸大麥價益踴貴欠稅皆下戶是重困小民也
卽日下詔聽從便雜輸粟豆以官鹽贖於民蠶事旣

畢卽以絲絹償官謂之蠶鹽又有食鹽卽隨租賦納
其直○景德中河北轉運使李士衡奏方春民不足
可給以錢使至夏輸絹民甚便之詔推其法於天下
謂之和預買景德中有司言京師民僦官舍居人獲
利多而輸官少乞增所輸許奪賃若人重遷必自增
其數上曰豈不太刻耶先帝屢嘗止絕其申戒之○
大中祥符五年三司請民販茶違法許家人告上曰
是犯教義非朝廷所宜言不許○上封者言川峽官
鹽價賤民間倍之請增其直免失厚利上曰官直賤
民間尚貴上更增直下益闕矣不許陝西轉運使張

象中言安邑縣兩池鹽見貯三億餘萬斤尚虞遺利
請申條約真宗曰過求羨餘當慮有時而闕不許○
蜀人以鐵錢重私為文券謂之交子以便貿易既久
而或不能償民訟不已天聖中知益州寇瑛請禁之
上曰蜀民用交子久矣罷之可乎下使者議以為官
置務則可以利民而止其欺上曰果利民其行之○
仁宗即位以真宗時嘗遣使江浙蠲放逋欠因登極
赦恩命知制誥張師德侍御史知雜事蔡齊詳定天
下欠負悉蠲除之其後命官放欠負蓋自此始○淄
州東沿舊以衙前主之治久廢州請均其課於諸縣

仁宗曰利出於治治既廢矣他縣力用之民何預而
使之輸耶命罷之○太平興國中編成方書賜諸道
州郡謂之太平聖惠方一百二十卷○仁宗謂輔臣
曰近時方伎之學廢故世無良醫人多橫夭乃命太
醫較定黃帝內經素問難經巢氏病源等模以頒天
下銅人鍼灸圖經一節今次於此以脫落今補於後
○仁宗以福建奏獄多蠱毒害人者福建醫工林士
元能以藥下之詔錄其方又命太醫集諸方之善治
蠱毒者為慶曆善救方命叅知政事丁度序之以頒
天下言者云雖有方書遠方或闕藥材不能自致詔

請以官錢治善救方諸藥以濟民○皇祐四年上以
方書雖多或藥品之衆昧者用之寡要貧者困於無
資命太醫集諸家已試之方而刪去浮沉而標脉證
兼敘病源名之曰簡要濟衆方宜令崇文院分作上
中下三冊印頒諸邑○樞密院韓琦言朝廷雖頒方
書以救民疾而貧民力或不能及請令諸節鎮及益
并慶渭四州歲賜錢二十萬餘州軍監十萬委長吏
選官合藥以時給散上如琦奏至今行之○仁宗謂
輔臣曰鍼砭之法世傳不同腧穴稍差或害人命其
令太醫王惟一考明堂氣穴經絡之會鑄腧穴銅人
式一置醫官院一置大相國寺惟一又纂集所闡糾
正訛謬爲銅人鍼灸圖經以進上命夏竦爲之序而
模以頒天下

典故

乾德三年宰相范質王溥魏仁浦同罷翌日制書以
趙普爲相無宰相書敕上召學士問故事陶穀曰自
來輔相未嘗虛位唯大和中甘露事數日無宰相命
僕射令狐楚奉行制書今尚書亦南省官可以書敕
竇儀曰穀所陳非承平之事不足爲比今皇弟開封
尹同平章事卽宰相之任也上曰儀之言是卽命晉

王書敕故事節度使不帶平章事者在大卿監下乾德五年始陞節度使班在龍墀內金吾上將軍之上太平興國二年詔常叅官知節鎮者借紫餘緋罷日仍舊○淳化元年益王元傑授楊潤大都督府長史學士張洎言唐以楊益潞幽荆五郡爲大都督府置長史司馬爲上佐其大都督非親王不授或親王淫領別命大臣領郡除長史副大使節度事今益王正大都督之任復爲長史乃是自爲上佐也呂蒙正以爲襄王越王皆領長史矣今吳王獨領大都督非便上曰業已差誤俟別除授并正之○淳化二年詔百

官次對又御文德殿群臣入閣復舊制也來年五月群臣入閣設黃麾杖新制也○三班使臣舊不免杖罰戶部尚書張齊賢修編敕始請以贖論○咸平六年詔河北東陝西轉運使副按邊經費勞於他路其月俸共給實錢至今行之○大中祥符六年陳世卿知廣州詔歲給添支錢七十萬公用錢五十萬遂著爲令真宗爲宰臣曰何承矩嘗請與藩臣封戶如何王旦對曰唐朝將帥富貴驕蹇往往陷於不道良由事勢强大朝廷姑息太過每移一帥未有帖然奉命者至于五代餘風未殄太祖制之有術迄今藩臣有

兼相印提禁旅及久當邊任者詔旨亟召則夙夜奔命好談古者特思慮未至爾上然之○王欽若言比見石普奏章用新州觀察使印上顧宰相問其事王且對曰普以河西節度使知許州此必許州觀察使印爾欽若之言謬矣凡節鎮有節度使印隨本司則州本吏用本州觀察使印又有州印文曰某州之印畫則州錄事叅軍掌用暮則納長吏所節度使在本鎮兵刑甲仗卽節度判官掌書記推官連書用節度使印民田租賦事卽觀察判官支使推官連書用觀察使印州司下符用本州印故命將必曰某軍節

度使得專制其軍旅也曰某州觀察使得廉問其風俗也曰某州刺史得刺舉其州軍也○天聖中都官員外郎吳耀卿言景德中江淮漕米歲不過四百五十萬石其後增至六百五十萬故江淮之間穀常貴而民益貧請約咸平景德中數立爲中制上詔發運司歲減漕米五十萬石○仁宗謂輔臣曰日者三司請以轉運使漕事集否爲昇黜之法意欲使修舉其職非誘之爲聚斂也如聞貪冒之人僥倖恩賞肆爲侵尅豈朝廷之意也轉運使考課法其亟除之梁惟吉知懷安軍其弟惟遜已任屬官惟吉母老乞改任

仁宗命有司自今如是者悉免遂爲定制

河渠

至道元年上問汴河疏鑿之始張洎上言曰昔大禹導河自積石至于龍門南至于華陰東至于砥柱又東至于孟津東過洛汭至于大伾卽成臯是也或云黎陽山禹以大河流泛中國爲害最甚乃於頓丘郡界疏二渠以分水勢一渠自陽武縣東引入漯水東北流至于乘縣入海卽今黃河是也一渠疏畎引竝西山以山東地形高敞穰東水勢不使流溢夾右碣石入于渤海書所謂北過泒水至于大陸泒水卽濁

漳也大陸卽邢州鉅鹿澤也播爲九河同爲逆河又于海河自魏郡貴鄉界爲九道下至滄州合爲一河言逆河者謂與海水往復相承也齊桓公霸世塞河廣田居惟一河水存焉今貝冀東界王莽枯河是也禹又於滎澤下分大河水爲陰溝引注東南以通淮泗大梁浚儀縣西北復分二渠一渠東經陽武縣南中牟臺下爲官度水一渠始皇疏鑿以灌魏都謂之鴻溝荑苕渠自滎陽五池口東注之其鴻溝卽出河之溝亦曰荑苕渠漢明帝時樂浪人王景謁者王吳始作浚渠故又以浚儀爲名靈帝建寧四年於敖城

西北壘石爲門以遏渠口故世謂之石門渠水東合
濟與河渠渾濤東注至敖渠水至此又兼入邲卽春
秋時晉楚戰于邲是也邲又音汜汜卽汴字古人避
反字故改從卞云卽字亦去反從卞同此義也渠水
又東經滎陽北旃然水自縣東流入汜水鄭州滎陽
縣西二十里三皇山上有二廣武城相去百餘步汴
水自兩城間東流而去其濟流自茲而絕唯汴渠首
受旃然水謂之鴻溝晉太和中桓溫北伐前燕將通
之不果義熙十三年劉裕西征姚秦復浚此渠始有
湍流奔注兩岸渠潰塞劉公更疏鑿而漕運隋煬帝

○大業二年詔尚書左丞皇甫誼發河南男女百萬
開汴水起滎澤入淮千餘里仍自汴河爲通濟渠又
發淮南兵夫十餘萬開祁溝自山陽淮陰至揚子江
三百餘里水面廣四十步而後行幸焉自是天下利
於轉輸昔孝文時賈誼上言漢以江淮爲奉地謂魚
鹽穀帛多出自東南也至五鳳中耿壽昌奏云故事
歲漕關東穀四百萬斛以給京師亦多自此渠漕運
唐初改通濟渠爲廣濟渠開元中裴耀卿上言江南
租船自長淮西北泝鴻溝轉相輸納於河陰獲嘉太
原等倉凡二年運米七百萬石涉於此也開元末汴

州刺史齊澣以江淮漕運經淮水波濤有沉損遂開
廣濟渠下流自泗水虹縣至楚州淮陰縣北十八里
合於淮踰時畢功既而水流浚急行旅艱險尋乃停
廢復由舊河德宗朝歲漕江淮米四十萬石以益關
中時叛將李正己田悅皆分軍守徐州臨渦口梁崇
義阻兵襄鄧南北漕引皆絕於是水陸轉運使杜佑
請改漕路由浚儀西十里疏其南涯引流入琵琶溝
經蔡州至陳州合潁水是秦漢故路以官漕久不由
此道故填淤不通若畎流培岸則功用甚寡又廬壽
之間有水道而平岡且其中曰雞鳴山佑請疏其兩

端皆可通舟其間登陸四十里而已則江湖黔嶺蜀
漢之粟可方舟而下由白沙東關經廬壽浮潁涉蔡
歷琵琶溝入汴河不復經揚楚沂淮之險徑於舊路
二十餘里功寡而利博朝議將行淮路通乃止今天
下甲卒百千萬人戰馬數十萬匹萃在京師仍以七
亡國之士民集于輦下比漢唐京十倍其人矣雖旬
服時有水旱不至艱歉者惠民金水五丈清汴四渠
派引脉分咸會天邑舳舻相接給贍公私所以無匱
乏也唯汴橫亘中國首承大河漕引江湖利盡南海
半天下之財賦悉由此路而進昔大禹疏鑿以分水

勢煬帝開畎以奉巡遊雖數堙廢而通流不絕終爲
國家之用者其天意乎天聖初右班殿直劉達言解
州安邑縣自後魏正始中都水校尉元清平坑水西
入大河以運鹽號永豐渠周齊之間其渠遂廢大業
中都水監姚暹決堰浚渠自陝郊西人解縣民賴其
利唐末渠復湮沒請復濬之上下其議轉運使王博
文以爲利遂命開浚渠成公私便之

戶口

建隆元年版籍之數州百一十一縣六百三十八戶
九十六萬七千三百五十三○開寶九年州二百九

十七縣一千八十六戶二百五十萬八千九百六十
五○至道三年戶四百五十一萬四千二百五十七
○大中祥符八年戶八百四十二萬二千四百三口
一千八百八十萬一千九百三十夏秋稅錢帛糧斛
二千二百七十六萬四千一百三十三絲綿禾草二
千二百八十三萬六千六百三十六茶鹽酒稅錢帛
金銀二千八百萬二千○寶元元年戶一千一十一
萬四千二百九十

雜錄

平蜀得鑄印官祝溫集自言祖思言爲唐禮部鑄印

官世習籀篆卽漢藝文志所謂屈曲纏繞以模印章者也遂命重鑄中書門下樞密院省臺寺監等印○樊若冰初在江南舉進士不第因嘗漁釣採石江上以漁船載絲繩度江之廣狹上書言江南可伐之狀太祖用其計下荆湖造大橋聯巨艦江南不守採石王師徑度遂破池陽初除舒州推官及計旣行遂領池州事積官至給事中太祖嘗問其名出何典記對曰臣慕唐右丞倪若水故名焉上笑曰可改名知古蓋上惡其聲近弱兵也唐右丞相乃倪若水謂之若水繆矣○日本國奄然太平興國九年自其國來因

得召見言其國王傳襲六十四世矣文武僚吏亦皆世官太宗歎謂群臣曰朕不敢自逸以冀運祚永久更賴忠良輔朕不逮無俾遠夷獨享斯慶○有宋大臣生享王封者符彥卿王景錢俶歿而追封者孟昶楚王慕容延釗河南郡王王審琦瑯邪郡王錢俶秦國王李繼勳隴西郡王劉繼元彭城郡王劉鋹南越王李煜吳王趙普真定郡王曹彬濟陽郡王錢惟濬邠王魏仁浦齊王石守信衛王劉美魏王李用和隴右郡王○以時政記進御自宰相李昉始以起居注進御自起居郎梁周翰始御史中丞得從遊宴自趙

昌言始集賢校理陪宴京師許乘馬入禁門自李宗
諤始以執政判禮儀院自丁謂始將帥在外遇大禮
賜賚自王德用程林李昭始○董遵誨世居幽州其
母在契丹太祖令人賂邊民使迎其母送於遵誨遣
外弟劉綜貢馬以謝上解所服真珠盤龍衣命齎賜
之綜曰遵誨人臣豈敢當此上曰吾委以方面不此
嫌也○太祖嘗命有司治第將賜郭進令蓋以甬瓦
有司言舊制非親王公主之第不用甬瓦上曰郭進
控扼西山十餘年使我無北顧憂我視進豈減兒女
耶○高敞國太平興國六年入貢其土卽後漢戊巳

校尉之地俗好騎射戴油帽謂之蘇幕遮

隆平集卷第四

宰臣

裔猶稽聖錄律未道行良彦校刊

范質字文素魏郡人母夢人授五色筆而質生唐長興中擢進士第仕晉至翰林學士周祖擢為宰相建隆初封魯國公乾德二年罷相初和凝知貢舉愛質所試文自以中第嘗在第十三名故亦以處質其後質官及封國皆與凝同當時謂之傳衣鉢質平居手不釋卷謂人曰嘗有異人言吾當大任無學術何以處之及司制誥人服其該贍奉行制敕未嘗破律為相不受四方饋獻祿調親族歿無餘財太祖歎其清

隋書卷四
慎曰真宰相也太宗亦言近世輔弼循規矩慎名器
無與比者特不能死周社稷乃其短爾子旻

魏仁浦字道濟衛郡人少爲刀筆吏隸樞密院周祖
爲樞密使問以中原卒乘數對曰帶甲者六萬及隱
帝遣人害周祖仁浦教以易其語云誅將士以激衆
怒心遂長驅渡河卽位擢樞密承旨復問郡邑屯兵
數仁浦詳對按籍無差世宗卽位差樞密副使陞使
繼命兼相對曰不由科第進曰顧才何如爾遂用之
世宗卞急輕殺戮仁浦營救而免者十常七八從出
征鋒鏑之下無橫死者有鄭元昭誣仁浦婦翁李溫

玉之子從李守政叛捕以告變欲中傷仁浦周祖力
辨其誣獲免及仁浦大用元昭懼卒以元昭繼典五
郡又嘗爲賈延徽譖幾遇禍總師出征有得延徽以
獻者仁浦曰因兵戈報私怨不忍爲也人稱其長者
建隆初不易其任乾德二年罷相卒子咸信尚王追
封仁浦王爵

王溥字齊物太原人漢乾祐中登進士第周祖鎮蒲
津召置幕府從征李守正王景崇得朝臣交結書周
祖欲暴其事溥力請焚之周祖將大漸趨草相制聞
宣畢曰吾無恨矣世宗嘗問漢相李崧蠟丸書結比

虜有記其辭者否溥曰使崧有此肯以示人耶逢吉輩搆之爾世宗遂優贈其官建隆初不易舊任乾德二年罷卒謚文獻後改曰文康父祚仕至上將軍祚致仕溥猶居相位每公侯引觴為壽溥侍側如嬰兒人稱其孝敬祚狗貨殖溥亦獲恡嗇譏孫貽永

貽永字秀長真宗以其故相家選尚太宗第四女鄭國長公主除右衛將軍駙馬都尉明年主薨卽納所賜宅累擢節度使歷宣徽使同知樞密院事改副使加同平章事以疾求罷聽免兼侍中至和初復以疾丐解職除右僕射檢校太師兼侍中鄧國公卒年七

十一贈太師中書令謚康靖子道卿貽永為人慎約寡言無綺紈聲色之好嘗知徐州河決滑臺作堤城南水至不為患王曾守南京表其事詔褒之鄆州咸平中徙城而故治為通衢密邇梁山温春夏多病涉貽永知鄆州相地築東南道二十餘里至今人獲其濟

薛居正字子平開封人父仁謙五代史有傳居正後唐清泰中登進士第仕周至刑部侍郎建隆初知劄州有亡卒數千為盜軍使疑城中釋子為應欲盡殺之居正以計緩其事生擒賊首乃知釋子千數無預

謀者乾德二年初置叅知政事居正及呂餘慶首當其選開寶六年拜相太平興國初進位司空薨謚文惠無子以同姓子惟立為嗣居正操行方重不事苛察好讀書為文敏贍有集二十卷詔李昉為之序沈淪字順宜陳留人名上一字避太宗舊名去之太祖初除同州節制辟在幕府屬改命皆從焉及卽位擢樞密副使開寶六年拜相太平興國四年罷卒謚恭惠平蜀日倫為計度制置使諸將以賄敗倫歸篋中唯圖書數卷在相位自守而已

盧多遜懷州人父億有操行仕至少府監周顯德末

登進士第開寶中累擢叅知政事九年拜相多遜博涉經史善伺人主意太祖每遣取書多遜伺知卽通夕閱視誥朝問書中事應答無滯上益寵待為翰林學士時屢於上前毀趙普及在相位普之子及其親屬多為所抑普再相廉知多遜嘗遣親吏交通秦王廷美因發其事追削官爵并其家配崖州卒于配所初王祐知制誥多遜欲祐協力擠普一日祐以宇文融排張說事示之怒出祐知華州及多遜敗明識士大夫服祐有

趙普字則平薊州人父迥徙常山又遷洛陽因占籍

焉劉詞節制永興辟為從事詞遣奏稱其才授滁州判官太祖以周世宗命破皇甫暉拔滁州聞普決獄多全活者方出鎮馮翊遂表為從事屢改命皆在幕府卽位授諫議大夫繼除樞密副使乾德二年代范質相久之罷太平興國初復相堂帖之行典詔敕無異太祖命勿復行八年授鄧州節制端拱元年復相淳化元年以疾罷除河南尹進位太師魏國公薨追封真定王諡忠獻卒年七十一設鹵簿葬舉唐制也普初無學術太宗勉之晚年頗該博在相位十年獨任政事閣中設大瓦壺中外章奏不欲行者擲壺中

既而焚去性多忌尅太祖嘗稱馮瑋欲大用普遂請以知梓州遣私奴從知郡伺其過失請闕訟之瑣醜隸沙門島十年三司使趙玘廉其市木治第事雷有隣又訟中書不法太祖惡之學士竇儀對因訪普所為儀曰不知退而曰我必不大用而必不知朱崖及詢盧多遜多遜乘間攻其短亟進預政事及普再相多遜遂有朱崖之命蜀人侯莫陳利用以方術進至團練使所為多不法普力言之上為黜利用普言之不已利用卒伏誅聞者忻快普在相位大夫有言人短長者必命吏追錄之有事則引以為證自是人無

敢言中書事益擁蔽又嘗建議以趙保忠鎮夏臺俾
圖繼遷反通謀幾為邊患時論罪之端拱復來頗為
同列所窺鬱鬱不得志而去雖然普遇事斷之無不
言與夫循嘿者有間矣

李昉字明遠真定人父超仕至集賢學士昉以門蔭
補齊郎漢乾祐中登進士第在周為翰林學士建隆
初遷中書舍人盧多遜攻趙普短太祖詢昉昉曰臣
書詔之外思不出位太宗征太原過常山賜羊酒俾
於居第讌集丞相至藩侯皆賦詩刻石太平興國八
年拜相建議復特政記先進御後付史館端拱初罷

淳化二年復相在位循謹自守臨事多恕為文慕白
居易所居有園亭又葺郊外宴遊之地多畜妓樂娛
樂親友與張洎盧多遜善薄張昉上嘗問多遜昉頗
為辨釋上曰多遜常毀卿不直一錢昉曰臣不敢誣
罷相張洎草詔深攻其短張昉時時造其第或問昉
昉曰我為廷尉獨李公未嘗以私事見于今雖退居
可見也昉薨贈司徒謚文正子宗諤

宗諤字昌武昉第三子七歲能屬文恥於父任得官
獨由鄉舉端拱二年登進士第性謙謹衣弊策蹇人
不知其宰相子也獻文召試除集賢校理太宗每有

二
卷四
篇詠多賜昉及宗訥宗諤屬和世榮之宗訥宗諤之
兄也宗諤官至諫議大夫翰林學士卒年四十九李
濬與宗諤同歲同月後一日生其卒亦後一日濬字
德淵冀州人父超為禁卒從潘美掌刑刀美嗜殺戮
超常緩之怒釋多全活者人以為有陰德濬官至右
司郎中樞密直學士宗諤博學曉音律尤精於典章
沿革朝廷劄制損益莫不與聞景德初北虜請和後
一歲生辰使至首命宗諤館伴自郊勞至餞禮有節
適行判太常寺鼓吹工之謬濫者無所容風流文雅
內行純至事繼母以孝稱二兄早卒舉嫂字孤人無

間言友其弟宗諒甚篤賞延所及皆先諸姪其卒也
子猶有未仕者獎借後學薦拔寒素接人有禮士大
夫愛慕之其書字勢傾側後進多擾筆効之罕有類
者為時之所貴如此有文集六十卷內外制集四十
卷又有家傳談錄行於世

宋琪字叔寶范陽薊人晉天福中在契丹舉進士登
第幽帥趙延壽惜其自陷虜廷辟為從事建隆間為
開封府推官太宗尹京禮遇甚厚即位累擢至叅知
政事太平興國八年與李昉同相因請盧多遜舊第
上惡而罷之薨年八十贈司空謚惠安琪有吏能辨

捷好談諧而寡學識

呂端字易直其先燕人父琦五代史有傳兄名犯太祖諱下一字字餘慶太祖節制同州餘慶爲賓佐及卽位累擢叅知政事蜀平知成都府不罷政事以執政蒞藩鎮自餘慶始歸朝復舊任旣而引疾求罷除尚書左丞卒年五十大祖幕客餘慶居其先趙普李處耘首大用餘慶獨不介意及除執政而處耘被黜同列欲其排之上問處耘第以實對普忤旨而罷仍力爲辨釋餘慶重厚有守所至以寬簡治與弟端俱以文官三品蔭補千牛衛備身端在周直史館建隆

初遷太常丞歷官四十年始大用淳化四年叅知政事至道初拜相太宗常恨任用之晚端持重識大體同列奏對或多異議一日內出手札戒諭自今中書事經呂端裁決乃得聞奏真宗卽位凡加體貌見必拱揖以其身體偉大爲納陛俾登殿所咸平初以疾罷薨年六十六贈司空謚正惠子荀藩蔚藹李惟清自樞密改中丞意端抑已屢遣人訟堂吏過又彈端父在病告端曰吾直道而行無所媿也端姿表瓌秀器識和裕屢遭擯斥未始經意嘗使高麗暴風折檣舟人恐怖端讀書自若兩使絕域後有往者必問端

爲宰相未其爲遠近所慕如此

李沆字太初洛州肥鄉人父炳仕至侍御史沆好學
沉厚寡言有精識炳常謂人曰此兒異日必致公輔
太平興國五年登進士第至王化基上書自薦太宗
曰李沆宋湜皆佳士也命相府同召試並除知制誥
沆官最下特升于上累擢給事中叅知政事淳化四
年罷真宗升儲以爲太子賓客詔儲君待以師傅禮
及卽位復叅知政事明年拜相北虜入寇車駕幸鄴
沆留守東京不戮一人輦下肅然景德元年薨年五
十八贈太尉中書令謚文靖沆博學內行修謹居位

慎重門無私謁終日危坐望之儼然上每議政語天
下安治沆常以四方水旱螟蝗爲言上深慰納旣薨
上對侍臣曰沆忠亮淳厚終始如一言畢泣涕久之
王旦嘗自謂器節不能逮沆世謂二人皆賢相也弟
贊源淮子簡

畢士安字舜舉代州人後居鄭州乾德四年登進士
第累遷至知制誥翰林學士真宗尹京士安爲開封
府判官卽位命擢知府復入翰林爲學士又爲侍讀
學士景德初叅知政事踰月拜相二年薨于位年六
十八贈太傅中書令謚文簡士安端重有識度善談

論所至以公正稱年高日昏讀書不輟有文集三十卷藏于家

呂蒙正字聖功河南人太平興國三年登進士甲科歷官一紀遂至相位嘗任知制誥翰林學士叅知政事端拱初相淳化二年罷四年復相六年罷相國朝以來三居相位唯趙普及蒙正沉厚寡言有器局以正道自特張紳知蔡州以賊敗有爲紳營解於上曰紳家富不至此特蒙正貧時有求不獲今報之爾上卽復紳官蒙正不辨後考課院得其實黜之太宗復謂曰張紳果有賊蒙正亦不荅判江寧府數遣中貴

人將命待之如在相位時不少減近制宰相子起家卽授水部員外郎加朝散階蒙正固辭止授九品京官自是以爲例罷相歸西洛養疾有園亭時會親舊環侍皆子孫間舉壽觴釋然自得真宗謁陵寢祠后土過洛汭兩幸其第當世榮之父龜圖仕至起居郎初龜圖黜妻劉并棄蒙正劉誓不改適及蒙正莅官迎二親同堂異室奉養並至時稱其孝累改封以許國公薨年六十八贈太師中書令

張齊賢曹州人徙居洛陽自言慕唐李太亮爲人故字師亮乾德間應科舉不中選太平興國二年登進

士第累擢至簽書樞密院樞密副使叅知政事淳化二年拜相咸平初復相屢進位至左右僕射請老以司空致仕飲食素過人執政後丁內艱水漿不入口者七日其後日一飣粥既祥乃方食脫粟飯三年酒肉菓菜不入門世稱其孝平日頗以致君自任言涉疎闊前後治獄全活甚衆未第時依太子少師李肅家及貴歲時祭之種放之用亦其薦也嘗為部使者務存寬太察訴牒多得其情嘗對太宗曰靈夏終為繼遷所擾人謂其過卒如所料在相位事有涉干請辭連李沆而齊賢獨任其責物論甚美及再相與寇

準相傾遠虧名節歸洛得唐裴晉公午橋莊有池榭松竹之勝日與親舊觴詠其間善教子孫皆能自立有文集表疏集雜編小說各數十卷

王旦字子明大名人父祐有文行國史有傳旦沉厚好學祐知其必至公輔手植三槐於庭以為識旦太平興國五年登進士第淳化初獻文除直史館明年知制誥祐又與書命旦不十年繼之咸平初入翰林為學士三年樞密副使四年叅知政事景德三年拜相在樞府一年叅知政事八年任首相十二年以疾懇求退不已意不可奪除太尉仍詔禮官具上事儀

未上而薨年六十一贈太師尚書令謚文正初旦與
錢若水同在西掖若水善人倫嘗曰王君峻睿聳壑
棟梁材也非吾所能及李沆以同年生亦相厚善謂
爲遠大之器且端重介直明達治體接物雖和易而
風格峻整當官臨事獨不可犯爲相屬罷兵之後務
在鎮靜善於獻納言簡順理愼惜名器敘進才品不
以私怨廢公義薦用人有終身不知者不許子弟應
舉以妨寒俊亦不薦補諸子居第湫隘服器質素與
弟旭友愛甚至敦獎名教留意文雅近世典章族氏
尤極該洽真宗初置天書刻玉使以且領之國朝以

來居相位天下無間言者唯旦及李沆云

向敏中字常之開封人父瑀唯一子教督甚嚴常謂
其妻曰大吾門者此子也太平興國五年登進士第
父之太宗飛白書敏中張詠二名付書書語宰相曰
此二人名臣也朕將用之淳化四年自廣南轉運使
召還除工部郎中擢樞密直學士與張詠並命是年
同知樞密院事自員外郎至是凡百日爾會曹彬除
樞密使改副使咸平初改叅知政事二年兼樞密使
出安撫河北以禁兵萬人翼從四年拜相五年坐市
薛居正第罷大中祥符五年復相天禧三年薨年七

十二贈太尉中書令謚文簡初太宗欲大用之當路者有言敏中在法寺時皇甫偁監無為推務以賄敗嘗求敏中從末減下御史臺捕偁僕詰之僕云有書敏中不啓封還之書今痊臨江軍傳舍遣索果得書緘題如故上驚異遂登用焉罷相出知永興軍適駕幸澶州密詔俾便宜從事詔不泄邊境以安故有復用之意敏中沉毅寡私交獨爲人主所知多智善保身識大體相位門無私諸子不使當事任雖處大事若已不與避遠權勢慎於薦拔大任幾三十年衰老猶不得謝時論目爲重德

寇準字平仲華州下邳人太平興國中登進士第器識文學時鮮其比初補歸州巴東令五年不得代既又宰大名府成安賦役期會書鄉里姓名揭之縣門民無違者巴東有秋風亭準析葦應物一言爲二句云野水無人度孤舟盡日橫識者知其必大用後因言事太宗深器之淳化二年擢樞密副使四年罷知青州太宗對左右數語及準有間言至終不能移上意五年召參知政事因奏對切直上怒起輒挽衣留以俟處決太宗歎曰真宰相才也上欲建儲密詢於準對曰謀及婦人中官近臣皆不可也惟擇所以副

天下望者上屏左右問曰襄王可乎對曰非臣所知也及真宗為太子人望翕然上曰天下心屬太子將置我何準曰願得所付天下之福也至道二年罷政知鄧州咸平六年除三司使景德元年與畢士安同相契丹入寇上召群臣問禦戎策畢士安請選將王欽若勸幸金陵陳堯叟以幸蜀為請準曰非親征不可上從準議兵威大振車駕及衛南而捷書來上三年罷相大中祥符七年除同平章事充樞密使八年罷天禧三年復相四年真宗不豫皇太后參議政準請問曰丁謂佞人也不可輔少主願擇方正大臣

翼太子上然之準因命楊億草太子監國制且進億以代謂甚密詰朝準被酒自漏言謂乘婦人車詣曹利用第謀逐準遂發周懷政朱能天書事遷準以太子太傅歸班請對不許降大常卿知相州徙安州貶道州司馬仁宗即位再貶雷州司戶踰年徙衡州司馬命未至卒年六十三詔許歸葬西京過公安縣民擁道設祭立竹焚幣焚餘竹無根株踰月皆自生邑民嗟賞節生竹地立祠歲時享之謂其竹曰寇公竹歲久成林人不忍伐仁宗對輔臣哀準以忠貶死贈中書令萊國公謚危身奉上曰忠佐國遭憂曰愍詔

賜準諡忠愍錢惟寅素忌準又諂附丁謂作樞密直
學士題名記輒不列準後蔡齊言於上即命刊去上
又哀準無子以從子隨為後乃擢其壻屯田員外郎
張子臯直秘閣俾齊詔河南就賜其家祭耐之初準
至雷州吏以圖經獻視其四至云東南門至海岸十
里準悅曰吾少時有云到海祇十里過山應萬重豈
偶然耶南行之初過零陵行橐為溪寇所掠其會聞
而趣還之世言忠義足動獷俗况氣同者乎準剛正
篤於自信不能與世俯仰故人多惡之至道郊恩以
左正言馮拯為虞部員外郎拯訴於朝罷政事者七

年未始少抑雖王旦亦以為好人懷惠又欲人畏威
皆大臣所宜避準自以為已任此其短也惡之者或
云在相位與張齊賢相傾或云朱能為天書降乾祐
縣準知而不言審如是丁謂之拂鬚固足以悅詎致
其媒孽邪及謂道出雷州欲見而不可得其不能與
世俯仰如此而庇以險詖庸回不其過歟準知將逝
遣人取太宗所賜通天犀帶於洛中半年始致沐浴
具朝服束帶北面再拜俄登榻而終非達於死生之
數能如是歟

王欽若字定國臨江軍新喻人少孤祖郁嘗曰吾歷

官五十餘年慎用刑活人多矣後必有興者其吾孫
李滄化三年登進士甲科累遷知制誥翰林學士咸
平四年參知政事景德初契丹入寇欽若請行以參
知政事判天雄軍上親燕以遣之還朝累求罷政事
制特置寶政殿學士寵之既久又加大學士之名景
德三年相樞密院事大中祥符五年除樞密使同平
章事七年兼同天書刻玉使是年罷八年復樞密使
平章事天禧元年拜相二年商州捕得道士譙之易
畜禁書能使六丁六甲神而欽若贈之詩故罷知杭
州踰年復資政大學士資善堂侍讀進司空既而除

節制檢校太師除平章事判河南府以疾不俟報赴
闕降司農卿分司南京仁宗卽位復秘書監改太常
卿刑部尚書天聖元年復相進司徒三年薨于位贈
太師中書令謚文穆錄親屬及門下吏二十餘人前
此宰相優卹未有其比欽若少時過圃田夜視天文
有紫微字赤色及使蜀褒城道中有通刺字未暇視
而與之見告欽若曰異日位在宰相旣去視刺字乃
唐裴晉公也自是遂喜神異事且撰文以紀之真宗
卽位欽若判三司理欠憑由司奏蠲乾德至咸平逋
負阡餘萬釋繫囚三阡餘人以廣惠澤參知政事日

有訟欽若及洪湛貢舉受賂命邢昺鞠之時上顧欽
若方隆故湛獨流儋州人以為寃大中祥符間與馬
知節同在樞府知節惡其為人不能相下故兩罷之
封泰山祀汾陰天下言符瑞欽若皆與焉朝廷有所
興作必委曲遷就以合上意與丁謂陳彭年林特及
內臣劉承規交通蹤跡詭異時論謂之五鬼真宗作
喜雪詩誤用旁韻王旦白欽若曰天子詩可校以禮
部格耶它日上謂輔臣曰王欽若幾為眾所哈與楊
億等同撰冊府元龜有褒詔則自為表謝譴問則戒
吏云第言億等故馬知節面斥其姦罔其後仁宗亦

謂王曾曰欽若所為真姦邪也五子皆天以從姪寅
亮為後欽若平日所撰有天書再降泰山祥瑞圖
簿記彤管懿範天書儀制翊聖傳聖祖事迹羅天人
醮五嶽廣同遷敘圖列宿萬靈廟真一圖共數百卷
丁謂字公言初字謂之蘇州人嘗袖文謁王禹偁禹
偁愛其文即為詩贈孫何及謂比之韓柳名遂大振
淳化三年登進士第累擢知制誥諫議大夫兩為三
司使大中祥符五年參知政事九年除節制知昇州
天禧間復參知政事改樞密使四年與李迪同相迪
對上斥謂姦邪同罷而謂詔留加司空封晉國公仁

宗卽位進司徒兼侍中坐雷允恭移山陵皇堂事罷
必保分司再貶崖州司戶叅軍凡五年徙雷州又三
年徙道州明道末復秘書監致仕居安州又徙光州
卒年七十二詔賜錢十萬絹百疋謂淳化間爲福建
轉使初置龍焙歲貢團茶數品供御咸平初峽路蠻
擾邊會分川峽爲四路謂領夔州轉運使措置蠻事
作誓刻石柱境上其後又入寇止委其酋領計平之
居五年詔許自舉代乃舉薛頌景德初契丹入寇謂
知鄆州虜騎稍南民大驚趣楊劉渡舟人邀利不時
濟謂斬死罪囚于河上舟人懼不復稽阻又令廣旗

何中立字公南許州人景祐元年登進士第多歷內
外官擢修起居注知制誥龍圖閣直學士樞密直學
士知杭州卒年五十四子景先景初景山景闔景俶
景甫景倩中立嗜酒而爲文頗正所至政事亦優權
知開封府以賊屬吏不服釋去中立至有復執所釋
囚來中立視之曰此真盜也窮治之果不能隱知慶
州有卒告大校受賊者中立治告者誣而置於法或
曰貸姦可乎曰人人得持短長以制其上將誰使督
戰于行陣也

陳從易字簡夫泉州人端拱初登進士第踐歷之久

始擢知制誥諫議大夫進龍圖閣直學士知杭州卒
年六十子紹孫繼孫維孫所著泉山集二十卷中書
制藁五卷西清奏議二卷嘗與楊大雅同在西掖但
以文學知名時謂之楊陳從易天禧中坐失舉送宰
相寇準素惡之遂除知吉州及準貶道州從易爲湖
南轉運使或謂曰可忘廬陵之命耶準至從易以故
相禮敬之言者爲慙素與王欽若善欽若廢居睢陽
親舊畏時相無敢見者從易赴河南見之欽若曰無
乃爲君累乎卒留數日而行

隆平集卷第十四

太后欲殺謂拯言上初卽位誅大臣駭天下耳目謂
得釋死拯嚴重中人傳宣中書未嘗與坐林特嘗詣
第累日不得通旣而令至中書卒亦不見

隆平集卷第四

隆平集卷第五

宰臣

商孫杜昂

校刊

王曾字孝先青州益都人咸平中登進士田科所試
有物混成賦天下以爲賦格累擢知制誥翰林學士
大中祥符九年參知政事時王欽若方挾祥瑞迎合
人主意陰排異已者以細故罷曾政事天禧中復參
知政事兼太子賓客仁宗卽位以爲宰相忤太后意
罷知青州景祐二年復相封沂國公與呂夷簡議論
不協求退出判鄆州加資政殿大學士卒年六十贈
侍中諡文正有文集五十卷子緯幼以姪澤爲後景

祐初契丹始修好所致書以南北朝冠國號之上會
時直史館言春秋外夷狄爵不過子今與抗非外夷
狄之意上嘉之天書降詔作玉清昭應宮廷臣莫有
言者曾陳五害以諫在翰林一日上晚坐承明殿召
對命謁者踰之曰思卿甚故不及御朝服為上所敬
如此知審刑院初違制之法無故失率坐徒二年曾
請分故失非親被制書者止以失論上不悅曰如是
無復有違制者曾曰如陛下言亦無復有失者矣自
是違制遂分故失天禧初知應天府民訛言有妖若
飛帽搏人自京以南皆驚恐曾夜開里門捕倡言者

民乃定真宗宴駕丁謂欲皇太后對近臣決政事皇
帝獨朔望見群臣庶務悉令入內押班雷允恭畫可
於禁中曾曰兩宮異處柄歸宦者禍端兆矣乃奏請
如東漢舊制太后坐右垂簾同聽政焉真宗不豫有
引唐漢事諷皇后稱制者曾密語后戚錢惟演曰今
太子決政資善堂天下固已屬望可異議耶惟演悟
不敢異議丁謂坐雷允恭改皇堂事叅知政事任中
正言於上曰謂被先帝顧託請如律議功曾曰謂不
忠無足議者於是謂貶崖州中正而下十數人隨亦
廢黜是時中外洶洶曾正色立朝姦邪憚焉前後輔

政十年處天下事審而中理性儉素居家人不見其喜愠之色入朝盛服進止如有尺寸士大夫服其清脩莫敢干以私者與王旦同謚世皆謂之賢相

李迪字復古濮州人少從柳開學爲古文開謂門人張景高弁曰此公輔器也景德二年登進士甲科累擢知制誥翰林學士天禧元年參知政事東宮建兼太子賓客寇準罷相上欲相之迪固辭一日對資福殿皇太子出拜上前曰蒙以賓客爲宰相上顧迪曰復何辭耶先丁謂拜相而以丁謂爲昭館大學位迪上帝不豫令皇太子總軍國事丁謂獨請皇太子止

決常務他皆聽旨迪爭不勝謂益擅權至除吏不以聞迪語同列曰迪起布衣至宰相能取容狗權臣耶時詔二府竝進秩兼東宮官乃遷迪中書侍郎兼尚書左丞故事宰相無作左丞者謂欲以抑迪也又欲進所善林特樞密副使兼賓客迪執不可因於待漏所大詬之至上前斥謂擅權不法事且言寇準無罪不當黜因格前制不下出謂知河南府迪鄆州謂入謝自陳無罪復留及仁宗卽位貶迪衡州團練使謂使人逼之至自裁不死謂竄迪稍復及章獻皇后崩乃再相景祐二年范諷以罪貶迪坐諷姻家以出知

亳州父之除翰林侍讀學士留京師奏呂夷簡結荆
王元儼爲除門僧惠清守闕鑒義鞠之乃迪在中書
時補降太常卿知密州父之復資政殿大學士知充
州元昊反乃上章請臨邊除節制判天雄軍康定二
年請老以太子太傅致仕卒年七十七贈司空諡文
定贈御篆碑額曰遺直之碑子東之徽之輔之初迪
在翰林時荐飢三司調用不給上召迪問迪對曰祖
宗置內藏庫欲攻取西北且備凶年今邊無他費以
佐國用則民不加賦上爲大發內庫金繒賜三司知
秦州曹瑋數言唃廝羅欲內寇請益兵不遣乃求罷

上問誰可代之迪曰非瑋莫能制也陛下重發兵得
非將上玉皇聖號耶上因問陝西兵數對曰臣向在
本道以方寸小策記兵及糧以備調發今猶置佩囊
中上令探取之自小黃門取紙扎迪悉上合存留及
調塞下數上曰不意頗牧復在吾禁中矣未幾唃廝
羅寇邊復召問對曰瑋必克後數日捷報至上曰卿
何料之審也曰彼舉兵遠來此堅壁待之是以知其
必勝爾垂簾日迪知河南許朝見章獻太后謂迪曰
卿不欲吾與國事吾今保養天子至此如何迪曰不
知太后有聖德也后喜

張知白字晦之滄州人端拱二年登進士第累遷龍圖閣待制御史中丞大中祥符九年叅知政事天禧二年罷爲侍讀學士知大名府真宗賦詩餞之仁宗卽位召爲樞密副使天聖三年拜相六年薨于位贈太傅中書令謚文節無子景德初周伯星見百官稱賀知白獨以爲人君當修德以應天星之見伏何所繫焉因極陳治道之要又以朝廷重內官輕外官引唐李嶠議請選臺閣分典藩郡仍自請補外真宗以知白居侍從不許及固請乃以知青州初知白叅知政事爲宰相王欽若所排及知南京欽若謫分司南

京衆謂必報之而知白待之加厚其在相位清約如寒士慎重名器人服其公

呂夷簡字坦夫壽州人曾祖夢奇後唐爲工部侍郎咸平三年夷簡登進士第累擢知制誥龍圖閣直學士仁宗卽位除叅知政事天聖六年拜相明道二年罷是年復相景祐二年封申國公四年罷以使相判許州徙天雄軍未幾復相慶曆元年進封許國公判樞密院以判院太重改兼樞密使二年以病特進司空平章軍國重事上憂之翦髭賜以療其疾夷簡薦富弼等數人可大用因再辭位進司徒固請老以太

尉致仕卒年六十六贈太師中書令諡文靖賜御篆
碑額曰懷忠之碑子公綽公鍊公弼公著公孺始王
旦嘗謂王曾曰夷簡器識遠大君其善交之後果與
曾竝相夷簡通判貝州按河北水災請除田器之算
重本因詔天下農器皆除算寇準知永興軍擢巨姦
徒湖南過關有上變事者夷簡曰此必有使之者宜
勿問益徒之遠方上從之權知開封與魯宗道同按
雷允恭徒皇堂事真宗既祔廟太后欲神主復日悉
陳其平生服玩夷簡曰太后奉遺以保嗣君非遠姦
進忠愛民欽天未足爲報也故事輔臣因郊恩遷官

夷簡與同列豫辭之遂著爲式章懿太后上仙夷簡
因奏事簾前曰聞夜中有宮嬪亡者太后卽起有頃
獨出謂夷簡曰卿欲離吾母子也夷簡曰太后他日
不欲保全劉氏乎太后悟乃發喪成服備禮葬之大
內災宮門晨未闢輔臣請對上御拱辰門樓百官拜
樓下夷簡獨不拜上遣問其故曰宮庭有變願一見
上上爲舉簾見之章獻皇后崩夷簡手疏清正朝綱
塞邪徑禁貨賂佞士絕女謁遠近悉罷力役節冗
費旣又立州郡學校授宗室環衛官建時親宅增教
授官置大宗正以總之郭后廢上欲立民間女陳氏

爲后夷簡力止之慶曆初契丹兵壓境夷簡請建都
大名示親征之意曰此囊瓦城郢計也於是建北京
天聖初太后臨朝內外無間言夷簡之力爲多議者
以其再相增北虜歲賜授宗室環衛官非計之得也
張士遜字順之光化軍人生百日始能啼淳化中登
進士第屢從外補當貢舉初用糊名法士遜試諸科
爲巡鋪自主司有親戚在進士中願引避不聽因自
言真宗是之遂詔自今舉人與試官有親嫌者皆移
試別頭後中書擬進江南轉運使闕帝自除士遜大
中祥符初詔天下州郡置天慶觀士遜請因諸舊觀

以省營造詔如其請久之選爲壽封郡王友及儲官
建遷諫議大夫兼右庶子又遷賓客天禧五年樞密
副使天聖六年拜相明年罷明道元年復相次年罷
寶元元年復相封郢國公七上章請老進鄧國公優
拜太傅致仕以宰相謝事前此所未有也就第十年
方卒年八十六贈太師中書令諡文懿賜御篆神道
碑額曰舊德之碑上欲臨奠左右言其日庚戌本命
也上曰朕以師臣夫復何避士遜七歲喪母養於其
姑姑亡徒跣扶柩特追封南安郡太君陳堯佐罷叅
知政事有挾怨上言堯佐欲反復有誣諫官陰附宗

室者士遜置二奏上前且言儉言動搖朝廷若一開
姦明則臣亦不能自保矣上悟置告者于法誣諫官
事亦寢在相位曹利用憑寵自恣而不能正時誚以
爲和鼓惡程琳叅知政事多異議孔道輔御史中丞
不附已欲併逐之鄭戩發琳市第事士遜諷道輔使
營釋之道輔不知其賣已遂言於上上疑以朋黨琳
及道輔俱被黜道輔憤惋而死楊偕嘗彈士遜納女
口於宮中事所著春坊斲筭等十集子友直友侗友
正

王隨字子正河南人咸平五年登進士第累擢知制

誥仁宗爲皇太子選任右庶子坐假周懷政白金落
知制誥改給事中知杭州乾興初復降爲祕書少監
知通州久之復給事中遷龍圖閣直學士知戎州戎
人多畜逃卒或忤意則執以求賞故坐法衆隨至下
令能自歸者免仍隸舊籍多所全活擢御史中丞明
道二年叅知政事景祐二年知樞密院事四年與陳
堯佐動輒忿爭無大臣體以災異援東漢策免例同
請罷除節制判河陽卒年六十七贈中書令謚章惠
子鑑錯錡初除隨京西轉運使言父母在洛中乃所
部真宗賜詩及羊酒束帶帛使過家爲壽時人榮之

在西北掖不善爲制命故出知應天府外若方嚴而所
治常失於寬善佛慕唐裴休爲人仍學其書世謂弗
逮也

陳堯佐字希元閩州人父省華國史有傳兄堯叟字
唐夫端拱二年登進士甲科太宗因詢其父省華翁
在常調遂召用之明年父子同日賜緋堯叟累擢樞
密直學士咸平四年同知樞密院事丁父憂起復景
德元年改簽書三年知院事大中祥符五年加平章
事樞密使兼群牧使七年罷八年復舊官職九年以
疾出爲右僕射知河陽疾甚求還至京卒年五十七

贈侍中諡文忠有文集三十卷

堯叟有材用多智術久典机密軍馬之籍皆能記之
究心群牧馬政多立條約公私以爲便嘗爲廣西轉
運使其俗有疾不服藥唯禱神堯叟以集驗方刻石
桂州驛舍是後始有服藥者嶺外少林木井泉堯叟
爲植木道傍鑿井置亭舍至今爲利性儉素事親至
孝母馮姓嚴堯叟未嘗忤其意堯佐端拱元年登進
士第累擢知制誥翰林學士天聖七年樞密副使改
叅知政事明道二年罷景祐四年與王隨同相次年
諫官論政事錯謬以宰相非其人遂與王隨同請罷

竝除使相堯佐判定州康定元年以太子太師致仕
居鄭州四年卒贈司空兼侍中諡文惠後事皆豫備
自誌其首曰有宋潁川生堯佐字希元道號知餘子
壽年八十二不爲天官一品不爲賤使相納祿不爲
辱三者粗可歸息於父母棲神之域矣有文集三十
卷又有潮陽編野廬編遣興策愚丘集子述古求古
學古道古博古脩古履古游古襲古象古初堯佐爲
開封府推官以言事貶通判潮州潮俗鄙陋始至爲
修宣聖廟作韓吏部祠堂人始知學有張氏子年十
六爲其舛浣衣惡溪爲鱉魚所噬堯佐慕韓吏部投

文惡溪因捕獲以文戮之於市爲兩浙轉運副使杭
州江堤舊以竹籠石潮濤所啣未幾輒壞堯佐議實
薪土以易之或言其不可而丁謂執政遂徙堯佐京
西其後堤久不成遂用薪土知滑州河決捲掃不能
定堯佐乃鑿木如編齒置於湍流隨水而下謂之木
龍遂殺水勢而提又護以長堤郡人謂之陳公堤在
樞府日太常博士陳詒知祥符縣以法繩吏吏悉遁
去章獻太后怒事下樞密院詒連姻宰相呂夷簡有
欲因詒中傷夷簡者堯佐以爲罪詒則姦人得計而
能吏沮矣詒遂獲免堯佐工爲二韻詩人多傳之性

一陰平集卷五
儉約不事浮侈嘗未第時同父省華及伯季訪華山
陳搏搏謂之曰三子皆將相然中子伯季所不逮也
卒如其言

弟堯咨字嘉謨咸平三年登進士甲科累擢知制誥
景德三年殿試進士與劉幾道於試卷中爲密號貶
鄆州團練副使大中祥符九年復知制誥遷集賢院
又遷龍圖閣直學士知永興軍所爲多不法上不欲
窮治止罷學士徙鄧州復知制誥常爲人所傾堯叟
乞示以所犯使知上保全之意因詔切責之乃引謝
久之復職仁宗卽位擢知開封府除翰林學士龍圖

學士換觀察使知天雄軍固辭不得已受之加留後
進武信軍節度使再知天雄軍卒年六十五贈太尉
謚康肅子敏古宗古昭古榮古垂古本古臻古堯咨
文著治本六篇諸宮上下編善射性豪侈在永
興置武庫建視草堂開三門築角道出入用刑慘刻
數凌陝西轉運使樂黃目黃目請徙以避之其事遂
達于上

章得象字希言世居泉州高祖任僞閩建州刺史因
家浦城毋夢登天得玉象而得象生旣生父夢廷中
積象笏如山因名之得象咸平五年登進士第累

擢知制誥翰林學士加承旨景祐三年同知樞密院
事實元元年與張士遜同相慶曆五年以使相判陳
州封鄒國公徙河南府引疾守司空致仕卒年七十
一贈太尉兼侍中諡文憲性簡重翰林十二年怡然
自得居相位八年親戚子弟皆抑而不進子澤之介
之廷之脩之仁宗嘗謂得象曰先太后臨朝群臣邪
正朕皆默識之卿獨忠清無所附麗故大用也

陳執中字昭譽父恕字仲言洪州人少爲小吏俄折
節讀書王明知洪州褐衣請見劇談時務明歎曰奇
士也太平興國初登進士第擢至給事中淳化二年

叅知政事坐以上意語樊知古辨析上前因罷政自
後屢遷至尚書左丞集賢院學士景祐元年卒年五
十九子淳執中執古恕長於長史在朝敢言端拱初
爲河北營田制置使密奏曰戍卒皆墮游仰食縣官
一旦使冬被甲兵春執耒耜恐變生不測旣得詔罷
營田止葺堡壁而已屢司金穀檢察甚峻常言出入
之任所當慎者起支定例人以爲當時在三司頗傷
苛碎知貢舉避嫌凡江南貢士皆被黜落又舉行貢
舉非其人條被罪者皆怨憤恕事親至孝居喪絕葷
茹哀毀過禮以故得疾不任治劇執中以父任爲正

字屢進文論真宗稱善召至闕下帝屬疾大臣無敢
及建儲執中上言太子天下本不可不早定明日上
袖所致演要三篇示大臣徐曰更有一佳文字乃所
陳建儲議因召見擢右正言坐公累奪正言出監岳
永真三州酒稅茶務累擢天章閣待制龍圖閣直學
士寶元元年知樞密院康定元年罷慶曆四年叅知
政事五年與賈昌朝同相皇祐初以疾求罷進吏部
尚書觀文殿學士知陳州乂之以使相判大名府五
年復相以笞小婢出外舍宛御史孫抃列其八事劾
奏之翰林學士歐陽脩亦論列于朝至和二年罷除

使相判亳州還上節鉞改右僕射封黃國公涉河南
曹州過京以疾賜告就第加司徒祁國公致仕卒年
七十贈太師兼侍中有司諡恭襄詔諡曰恭執中當
國八年人莫干以私四方問遺無及門者在中書不
欲外聞差除每退朝即閉省東門又罷三司百司勾
當公事及三司所舉場務官皇祐末貴妃薨上嘗詢
之不能考正典禮以對遂至追無再論罪之

晏殊字同叔撫州臨川人七歲善爲文景德初李昉
張知白安撫江南薦之召試陽賦遂七日身後二日
復試詩賦論自言賦題已嘗我一自言其不欺爲改

題文成稱旨擢正字祕閣讀書丁父母憂皆特起復
仁宗封昇王爲記室升儲爲太子舍人累擢知制誥
翰林學士天聖三年樞密副使五年罷旣而除御史
中丞改資政殿學士兼翰林侍讀學士除三司使復
樞密副使未拜改叅知政事章獻太后崩以禮部尚
書罷知亳州陳州復爲御史中丞三司使康定初知
樞密院事未幾除樞密使慶曆二年加平章事三年
與章得象同相四年諫官孫甫蔡襄彈奏所撰李宸
妃墓銘不言上宸妃所生及役兵治產事除工部尚
書知潁州應天府許州復觀文殿學士知永興軍河

南府以疾請歸京訪醫留侍經筵提舉萬壽觀卒年
六十五贈司空兼侍中諡元憲真宗嘗謂輔臣曰殊
少年孤立力學自奮加以沉謹京師賜酺京官不預
會同輩召出觀不荅其弟穎亦能屬文朕遣取所業
且戒殊勿爲改竄弟請潤色不之省亦不言其故周
慎如此信知其稟賦異也在三司時元昊叛陝西用
兵殊請罷監兵仍不以陣圖授諸將及募教弓箭手
又請出宮中無用之物以佐邊費由是悉罷他日之
領財利者還度支物爲樞密副使從幸玉清昭應宮
怒從者笏後至擊折其齒緣是遂出性剛峻簡率如

此雖少富貴奉養若寒士當世賢士大夫如范仲淹
歐陽脩孔道輔輩皆出其門其爲文章瞻麗應用無
窮尤工風雅才有餘思子居厚成裕如止明遠祇德
幾道傳正女適富弼楊察其文集二百四十卷又有
臨川集二州集二府集又取梁陳至唐人文章爲一
集旣葬御篆其神道碑云

杜衍字世昌越州人大中祥符元年登進士第累擢
天章閣待制樞密直學士御史中丞龍圖閣學士康
定元年同知樞密院事改副使出爲河東宣撫使慶
曆三年樞密使四年拜相兼樞密使五年罷明年順

還印綬以太子少師致仕故相一上章服以三少致
事非故事議者以爲賈昌朝疾之故也謝事十餘年
累遷至太子大師祁國公卒年八十贈司徒兼侍中
諡文獻子訢衍臨終作遺疏千餘言其略云勿以父
安忽邊防之戒勿以旣富輕國用之原又請早建儲
副以安天下心衍清介舊無居第旣退方葺舍南都
出入如平日無軒冕意好吟詩晚喜草書在相位多
裁抑僥倖衆所不悅御史劾奏其婚蘇舜欽集妓樂
進奏院祠神事又王益柔作傲歌語涉指斥欲下御
史按罪衍謂羅織獄今起都下矣執不可又諫官孫

甫言丁度面求進用請屬吏行不為致對范仲淹富弼出宣撫言者隨攻之上欲罷二人行又以為不可遂疑其朋黨出知兗州范仲淹嘗出行門一後數爭事上前行無愠色仲淹益敬服焉

龐籍字醇之單州人大中祥符八年登進士第累擢天章閣待制龍圖閣直學士慶曆四年樞密副使皇祐三年拜相五年罷以使相觀文殿學士知并州徙青州請老以太子太保致仕卒年七十六贈司空兼侍中諡莊敏子元英元中元直初籍為大理寺丞預編天聖勅累擢殿中侍御史章獻太后崩籍下閣門

取垂簾儀制盡燔之有欲造後宛珠玉奇功物媚上者籍書螟蠱為災民憂轉徙復有西北夷狄之患苟非儉約何以濟用上嘉納之為開封府判官尚美人遣內侍韓從禮稱教旨免工人市籍者籍言於上上為杖從禮仍詔諸司自今宮中傳命無得施行知延州自五龍川之敗戎落民居焚毀幾盡戍兵十餘萬未有營壁籍按金明西北有渾州川土平次川尾自橋子谷即虜出入之隘道也命鈐轄狄青將萬人築招安寨於谷旁募民耕墾得粟甚多凡故地為虜所據者悉逐之築土城久之元昊遣牙校齎其親信野

利旺榮書求納款籍意其詐不受後數日果寇定川
既而復以旺榮書來而元昊亦去僭號籍不敢荅乃
請於朝朝廷厭兵議招懷之使籍荅書稱旺榮爲太
尉籍復請曰太尉天子三公使旺榮稱之則元昊不
可得臣矣其書自稱寧令或謨寧全皆虜中官於義
無嫌詔從之踰年又遣使來改名曰曩宵稱男不稱
臣籍言名體未正不敢以聞其所求自至京師若天
子不許則更歸議之籍言虜辭理浸順德其使至仍
遣使同往申諭之卒用其策而元昊復臣及爲樞密
副使又請併省官屬徙兵就食於是邊費十省七八

其後又與中書議汰冗兵八萬焉與相曰儂智高叛
或言狄青不可專任上以問籍籍曰青起行伍若以
文臣間之則號令不專不如不遣也上然之及捷書
至上謂籍曰非卿執議豈時成功旣而推恩二廣應
舉者六百九十一人時以爲僭嘉祐中皇嗣未建上
不豫籍密疏言之甚切

劉沆字冲之吉州永新人父素不仕以財雄鄉里曾
祖景洪事楊行密爲江西牙將有彭玕者據州稱太
宗脅景洪附湖南僞許之復以州歸行密遂不仕嘗
謂人曰我不從彭玕當活萬餘人後必有隆者因名

所居山曰後隆山山有唐牛僧孺讀書堂故墓卽其上築臺曰聰明臺沈母夢牛相公來而生沈天聖八年登進士第累擢知制誥龍圖閣學士皇祐三年叅知政事至和元年拜相嘉祐元年罷知南京徙知陳州卒年六十六仁宗作挽詩賜其家又篆其碑額曰思賢之碑沈倜儻任氣所至有治聲決訟多中理時論比之張詠知衡州有大姓尹氏爲僞券以欺鄰人之孤訟久不得直沈至其孤纔二十詰尹氏曰若券曾取證他鄰否其人當有存者尹氏辭詘服刑而歸其田知潭州有草寇黃捉鬼鄧和尚誘溪洞徑人擾

湖湘北軍至多病死沈募土兵使保地分賊稍困乃令提點刑獄楊畋等八路入討斬首萬餘級遂頓兵開一路榜曰賊由此路出降敢殺者與擅殺同於是降者三四萬人賊平召還而餘黨復叛殺裨將降知鄂州其後權知開封府有張彥方受富民金僞爲張貴妃母越國太夫人奏補助教勅沈抵彥方死不問越國及叅知政事包拯論沈緣貴妃進後追冊貴妃爲后而沈爲園陵使既葬賜妃閣金器百兩辭不受在相位疾言者屢加裁抑又舉行御史遷次之格滿三歲者與知州范師道趙抃歲滿求郡獨引勅出之

中丞張昇等言沆挾私出御史沆乃言臺官將有不測之謀論辨不已遂罷知南京子瑾瑑瑄

賈昌朝字子明真定人晉中書舍人緯之曾孫天禧元年獻頌召試賜同進士出身景祐元年初置崇政殿說書以授昌朝而天章閣置侍讀亦自昌朝始累擢知制誥龍圖閣直學士權知開封府御史中丞慶曆三年參知政事四年樞密使五年拜相七年除使相判大名府王則平加檢校太師封安國公楊偕言賊發所部不當賞弗聽皇祐元年徙鄭州留以觀文殿大學士判都省又求補外除右僕射使侍中判鄭

州辭僕射侍中改使相二年喪母去位四年除故官召對經筵講易出判許州移大名嘉祐元年樞密使仍同平章事三年諫官御史言昌朝別爲客位以待官又釋其矯制者罪雖無實罷爲使侍中景靈宮使七年復判大名府英宗卽位加左僕射鳳翔尹魏國公治平元年求還使侍中不許二年改觀文殿大學士判都省卒年六十八諡田文昌朝在經筵善講說仁宗一所質問皆記錄刪潤以進賜名邇英廷議二閣記注錄太平興國寺災以易春秋進戒因言可勿繕治以稱順天愛人之意西域僧以佛骨銅像獻請

加賜遣還勿示外皆從之銓法縣令俸錢滿百二十
千者乃注舉縣令人昌朝判銓以爲如此則小縣終
不得善令矣仍一等給俸劉平石元孫陷西虜或誣
以降議收其族昌朝爲中丞言事未可知乃不果收
及在相位元孫自西夏歸議賜死昌朝獨曰自古將
帥被執歸不死元孫得不死侍講林瑀以天子卽位
年月傳會易算推吉凶昌朝疏出之元昊反昌朝請
減不急費詔令與三司合議歲百萬緡又言待夷狄
六事時皆用之在大名河決商湖中書議歸之六卷
昌朝力爭之不已其後河果不可塞振救瀕河水之

之民全活甚衆中人劉恢往還河上言河決趙征村
與上姓名嫌爲不祥或謂昌朝使之以搖當國者昌
朝博學善議論爲一代名臣及大用不爲正人所與
而數有攻其結宮宦官者有奏議文集各二十卷
通紀八十卷本朝時令十二卷群經音辨十卷

宋庠字公序安州人舉進士開封禮部皆第一人天
聖元年賜進士及第與弟同有時名以詩賦爲學者
所宗謂之二宋庠初名郊李淑因對言於上曰郊交
也姓與國號同而名交非所宜仁宗語之更焉累擢
知制誥翰林學士寶元二年叅知政事出知揚州加

資政殿學士慶曆五年復叅知政事八年樞密使皇
祐元年與文彥博同相二年罷為觀文殿學士知河
南府徙許州河陽嘉祐三年同平章事樞密使封莒
國公五年罷以使相判鄭州徙相州英宗卽位移鎮
加檢校太師鄭國公景靈宮使屢請老不許出判毫
州其請不已乃以司空致仕卒年七十諡元憲上篆
其碑額曰忠規德範之碑初制舉人與武舉雜試庠
建言六科待天下異士宜設次具酒食禮之武舉人
別試上從其請慶曆中仁宗召兩府資政殿親策以
時事庠獨以爲兩漢對策本延嵩穴草萊之人臣

等備位大臣自視遇如賤士非所以尊朝廷乃請歸
中書令議上奏從之後又手詔以時事詢兩府與庠
同推庠爲對庠所至以靜鎮爲治末年信愛幼子頗
致物議性儉約不喜聲色讀書至老不倦初在西掖
上欲以同知樞密院故事無自知制誥除者乃召入
翰林而用弟祁

祁字子京與兄庠同試吏部會諒陰止奏名初爲第
一章獻太后云弟不可先其兄可擢庠第一而祁爲
第十人兄弟友愛甚篤仍同簽甲科初釋褐授復州
軍事推官累擢脩起居注次當知制誥而庠叅知政

事乃除天章閣待制庠罷除知制誥歷龍圖閣直學
士翰林學士庠復執政改龍圖閣直學士樞密使復
翰林學士當張貴妃制初欲以告進問李淑淑曰第
進之上意在冊禮部乃進告遂落職知許州未數日
復侍讀學士又復龍圖閣學士御史言其子與張彥
方游出知亳州徙成德軍加端明殿學士吏部侍郎
知益州代還除三司使中丞包拯言初在益州多遊
燕又其兄在政府乃以龍圖閣學士知鄭州唐書成
進工部尚書踰日爲翰林學士丞旨除群牧使卒年
六十四贈刑部尚書將終親草遺表勸立皇嗣其

子勿請諡勿乞遺恩勿爲銘誌勿修佛事子定國彥
國惠國輔國奉國順國亮國保國俊國廣國有文集
一百卷廣樂記六十五卷唐書列傳一百五十卷脩
唐書十餘年雖外官亦以藁自隨非特文章有見於
世其守邊議兵雖古之名將不能過也章疏之達於
上者尤切世務卒不至大用時論惜之





